

Uunga

allannguutissatut siunnersuut

Uunga siunnersuut: Sumiiffinni immikkut toqqakkani takornariartunut kiffartuussinermik ingerlatsinissamat akuersissuteqartarneq pillugu Inatsisartut inatsisaattut siunnersuut

Pingajussaaneerinninnermi Naalakkersuisunit saqqummiunneqartoq.

Siunnersuutip qulequtaanut

1. Siunnersuutip qulequtaa ima oqaasertaliorneqassaaq:

”Uunga siunnersuut:

Sumiiffinni immikkut toqqakkani takornarianik sullissisinnaanermut akuersissutit pillugit Inatsisartut inatsisaat”

§§ 1-miit 28 ilanngullugu aalajangersakkanut

2. §§ 1-miit 28 ilanngullugu ima oqaasertaliorneqassapput:

”Kapitali 1

Atuuffia aamma isumasuu

§ 1. Takornarianik sullissinissanut akuersissutinut inatsisartut inatsisaat atuuppoq.

Imm. 2. Illunut, illulianut, aaqqissuussinernut, aqqusinernut aamma attaveqaasersuutinut allanut, takornarianik sullissinermik tunniussinernut atatillugu atorneqartunut, inatsisartut inatsisaat aamma atuuppoq.

Imm. 3. Takornariartitsinermik suliaqarneq aamma inuussutissarsiutigalugu sulinermut zonenut immikkoortiterineq il.il. aamma sumiiffiit ilaanni atuisinnaanermut killiliineq pillugit Inatsisartut inatsisaat malillugu, suliniutinut takornariartitsinermik suliaqarnermut akuersissutinut ilaasunut, inatsisartut inatsisaat atuutinngilaq.

§ 2. Inuup nalinginnaasumik najugaata imaluunniit najugaqarfiata avataanut angalasoq, aamma angalaneq tamakkerluni imaluunniit ilaannaa nuannaariarnissaq, peqqissarnissaq imaluunniit sulinnigiffeqarnissaq eqqarsaatigalugu pippat, aamma tassunga atatillugu sullissinermik pissarsippat, inatsisartut inatsisaanni matumani inuk “takornariatut” paasineqassaaq.

Imm. 2. Sullissineq suliniutinut ilusilik imaluunniit nioqqutissiatut pingaarnertut takornariatut sammitinneqartoq, aamma akiliisitsilluni tunniunneqartoq, “takornarianik sullissinertut” paasineqassaaq.

Imm. 3. Nunap ilaani sumiiffiup killillip iluani takornarianik sullissinermik imaluunniit sullissinernik arlalinnik tunniussinissamut pisinnaatitaaffittut “takornarianik sullissinernut akuersissut” paasineqassaaq.

Imm. 4. Inuk imaluunniit inatsisitigut pisinnaatitaasoq pisussaataasorlu, imm. 3 malillugu takornarianik sullissisinnanermut akuersissummik tunineqartoq “piginnaatitaaffinnik piginnittut” paasineqassaaq.

Imm. 5. Takornarianik sullissinernut akuersissutinik nalunaarfigineqarnissaq pillugu nalinginnaasumik pisortanit qinnuteqaatinik nassiusseqqusinertut, inatsisartut inatsisaanni matumani “neqerooruteqartitsineq” paasineqassaaq.

Imm. 6. Sulisitat Kalaallit Nunaanni inunnik nalunaarsuisarfimmi nalunaarsorneqarlutik adresseqartut, “sumiiffimmi sulisitatut” paasineqassapput.

Imm. 7. Pisiortorfiit Det Centrale Virksomhedsregisterimi (CVR-imi) Kalaallit Nunaanni angerlarsimaffeartutut nalunaarsorneqarsimanissamik pisussaaffeartut, inatsisartut inatsisaanni matumani “najukkani pisiortorfittut” paasineqassapput.

Kapitali 2

Takornarianik sullissinnaanermut akuersissutit

§ 3. Nunami sumiiffinni killilinni takornarianik sullissinermik tunniussinerni, akuersissummik tunniussisoqarnissaata piumasarineqarnissaa pillugu Naalakkersuisut malittarisassanik aalajangersaasinnaapput.

Imm. 2. Sumiiffimmi tassani takornarianik sullissinerit allatut ilusillit tunniunneqarsinnaanerat, sumiiffimmi takornarianik sullissinerit suussusaannut aalajangersimasunut akuersissummik piumasaqaatip mattutinngilaa.

§ 4. Inatsisartut inatsisaanni matumani § 9 malillugu ingerlatseriaaseq, aamma inatsisartut inatsisaanni matumani § 10 malillugu toqqaanissamut aalajangiinermut tunngaviit, aamma § 11 malillugu piumasaqaatit minnerpaaffissaanut aalajangersakkat tunngavigalugit, Naalakkersuisut akuersissummik nalunaaruteqarsinnaapput. Takornarianik sullissisinnanermut akuersissut kisermaassassanngorlugu nalunaarutigineqassaaq.

Imm. 2. Imm. 1 malillugu takornarianik sullissisinnanermut akuersissummik nalunaarfigitinniaaraanni, inatsisartut inatsisaanni §§ 12-imiit 15 ilanngullugu piumasaqaatigineqartut aamma § 16 malillugu malittarisassat aalajangersarneqartut qinnuteqartup naammassisimassavai. Piffissami akuersissuteqarfiusumi tamarmi pisinnaatitaaffimmik piginnittup piumasaqaatit taakku naammassisavai.

Imm. 3. Takornarianik sullissisinnanermut akuersissut sioqqutsisumik Naalakkersuisunit allakkatigut akuersissummik pinikkut allannut tunniunneqarsinnaavoq.

Imm. 4. Pisinnaatitaaffinnik piginnittut, akuersissummik pisimasut kikkuuneri, sumiiffimmi sumi akuersissut tunniunneqarsimanersoq, suut akuersissuteqarfiusimanersut, kiisalu akuersissutip sivilissusaa Naalakkersuisut tamanut saqqummiussinnaavaat.

Imm. 5. Imm. 1 malillugu takornarianik sullissisinnaanermut akuersissutip tunniunneqarnissaanut piomasaaqatit pillugit Naalakkersuisut malittarisassanik erseqqinnerusunik aalajangersaasinnaapput.

Imm. 6. Tamatumunnga tunngatillugu akuersissutit nalunaarutigineqarnissaannut piginnaasaqarneq kommunalbestyrelsinut suliassiissutigineqarnissaa pillugu, Naalakkersuisut malittarisassanik aalajangersaasinnaapput.

§ 5. Takornarianik sullissisinnaanermut akuersissutit piffissami ukiut 20-it tikillugit nalunaarutigineqassapput.

Imm. 2. Piffissap akuersissuteqarfiusup ukiut 20-it tikillugit sivitsorneqarnissaa Naalakkersuisut nalunaarutigisinnaavaat.

Imm. 3. Imm. 1-imiit 2 ilanngullugu apeqquataatinnagit, akuersissummut piffissaliussap ataatsimoortup ukiut 30-it qaangissanngilai.

§ 6. Suliniut inatsisartut inatsisaannut ilaatinneqartut pillugit paasissutissat tamaasa oqartussaasut sulianik suliarinninnerannut pisariaqartinneqartut, pinsinnaatitaaffimmik piginnittup Naalakkersuisunut nalunaarutigisavai.

Imm. 2. Paasissutissiinissamik pisussaaffiup annertussusaa, qanoq ittuulluni aamma qanoq iluseqarluni nassiunneqarnissaa pillugit, Naalakkersuisut malittarisassanik aalajangersaasinnaapput.

§ 7. Sumiiffiup akuersissuteqarfiusup kommunianut, takornarianik sullissisinnaanermut akuersissutinut ataatsimiititaliamik nalilersuisussamik pilersitsinissaq atuinissarlu pillugit Naalakkersuisut aalajangiisinnaapput.

Imm. 2. Sumiiffimmuut akuersissuteqarfiusussamut qinnuteqaatit pissutsillu allat inatsisartut inatsisaanni matumani ilaatinneqartut tunngavigalugit, Naalakkersuisut noqqaassuteqarnerisigut akuersissutinut ataatsimiititaliaq innersuussuteqassaaq.

Imm. 3. Akuersissutinut ataatsimiititaliami ilaasortat toqqarneqarnissaannut, siulittaasup toqqarneqarnissaanut, kiisalu akuersissutinut ataatsimiititaliami taasisarneq pillugit malittarisassat pillugit, Naalakkersuisut malittarisassanik aalajangersaasinnaapput.

§ 8. Inatsisartut inatsisaanni matumani § 3-mi, §§ 12-imiit 15 ilanngullugu aamma §§ 17-imiit 18 ilanngullugu kiisalu inatsisartut inatsisaat manna malillugu aalajangersakkat aalajangersarneqartut malillugit piomasaaqatit avaqqunneqarnissaat, Naalakkersuisut pisuni immikkut ittuni akuersissutigisinnaavaat.

Kapitali 3

Takornarianik sullissisinnaanermut akuersissutit nalunaarutigineqarnerat

§ 9. Neqerooruteqartitsinerup kingorna aamma § 7, imm. 1 malillugu akuersissutinut ataatsimiititalianik attuumassuteqartunik tusarniaareernikkut, takornarianik sullissisinnaanermut akuersissut nalunaarutigineqassaaq. Qinnuteqarfissamut piffissaliussaq sioqqullugu minnerpaamik

ullorsiutini ullut 45-t sioqqullugit, Naalakkersuisut nittartagaanni kiisalu tusagassiuutini Naalakkersuisut neqerooruteqartitsineq tamanut saqqummiutissavaat.

Imm. 2. Sumiiffimmut aalajangersimasumut neqerooruteqartitsisoqarsimappat, neqerooruteqartitsinerlu qinnuteqartumut piginnaassuseqartumut akuersissummik nalunaaruteqarnissamut periarfissiisimangippat, qinnuteqarnissamut piffissaliussap naanerata kingorna kingusinnerpaamik qaammatit 18-it qaangiutsinnagit qinnuteqaatip tiguneqarsimanissaa piumasaaqatigalugu, nutaamik neqerooruteqartitseqqinnani takornarianik sullissisinnaanermut akuersissut nalunaarutigineqarsinnaavoq.

Imm. 3. Ingerlatseriaatsit imm. 1-imi aamma imm. 2-mi taaneqartut malillugit qinnuteqaatit tunngavigalugit, takornarianik sullissisinnaanermut akuersissutip nalunaarutigineqarnissaa Naalakkersuisut pinngitsoortissinnaavaat.

§ 10. Neqerooruteqartitsinermi toqqaanissamut aalajangiinermi tunngaviit tulliuuttu atorineqassapput, taamaattoq imm. 2 takuuk:

- 1) Qinnuteqartup takornarianik sullissisinnaanermut akuersissummi pisussaaffimminik isumaginninnissaanut tekniskiusunut tunngasumik piginnaasai pisariaqartinneqartut.
- 2) Qinnuteqartup takornarianik sullissisinnaanermut akuersissummi pisussaaffimminik isumaginninnissaanut aningaasaqarnermut tunngasumik piginnaasai pisariaqartinneqartut.
- 3) Qinnuteqartup takornarianik sullissinissaq taanna imaluunniit sullissinissat taakku tunniunnissaannut periaasia, qinnuteqartup suliniutit pillugit pilersaarusiatus missingersuusiaani uppersarneqartoq imaluunniit uppersarneqartut.
- 4) Sumiiffimmi tamarmi imaluunniit sumiiffiup ilaani, siunissami takornarianik sullissisinnaanermik akuersissuteqarfiusinnaasutut ilaatinneqartumi, takornarianik sullissinerit suussusaata imaluunniit suussusaasa assingi pillugit pisinerulersitsiniarnermut, neqerooruteqarnermut, tuniniaanermut aamma tunniussinermut qinnuteqartup suliarinninniarnera imaluunniit piviusumik pilersaarusiornera.
- 5) Piujuartitsinermik periaaseqarluni, pinngortitamut, avatangiisinut, silap pissusaanut, sulisut pisinnaatitaaffiitut aamma inuiaqatigiit soqutigisaannut nalinginnaasunut naleqquttumik qinnuteqartup takornarianik sullissinerit pillugit suliniutinik suliaqarsinnaanermut piginnaassuseqarnera aamma piumasuseqarnera.

Imm. 2. Toqqaanissamut aalajangiinermut tunngaviit aallaavigalugit naliliinerup kingorna, qinnuteqartut naligiittut akornanni, inaarutaasumik toqqaanissaq siunertaralugu, imm. 1-imi taaneqartunit allaanerusunik, toqqaanissamut aalajangiinermi tunngavinnik naleqquttunik allanik, piviusoq naapertorlugu aamma kinaassusersiunngitsunik toqqaanissamut aalajangiinermut tunngavinnik Naalakkersuisut aalajangersaasinaapput.

Imm. 3. Aalajangiinermut tunngaviit imm. 1-imi aamma 2-mi taaneqartut aamma aalajangiinissamut tunngaviit imminnut missingersuunneqarnerat, § 9, imm. 1 malillugu neqerooruteqartitsinermut atatillugu tamanut saqqummiunneqassapput.

§ 11. Piumasaqaatit minnerpaaffissaat, qinnuteqartup piukkunneqarniarluni naammassisassai, neqerooruteqartitsinermut atatillugu Naalakkersuisut aalajangersarsinnaavaat.

Kapitali 4

Pisinnaatitaaffinnik piginnittut

§ 12. Takornarianik sullissisinnaanermik akuersissut taamaallaat inunnut tulliuuttunik naammassinnittunut nalunaarutigineqarsinnaavoq:

- 1) Kalaallit Nunaanni inunnik nalunaarsuisarfimmi adresseqartumut aamma piffissami minnerpaamik ukiut 5 qinnuteqarfik sioqqullugu tassani nalunaarsorneqarsimalluni,
- 2) Kalaallit Nunaannut tamakkiisumik akileraartussaataasumut,
- 3) nammineq pisuussutiminik tamakkiisumik atuisinnaasumut aamma akiliisinnaajunnaarnej-, akiliisinnaannginneq- imaluunniit atorunnaarsitsineq pillugit suliaqarfigineqanngitsumut, aamma
- 4) pisortanut 100.000 kr.-it sinnerlugit akiligassanik akilerneqareertussaagaluani akiligassaqanngitsumut.

§ 13. Takornarianik sullissisinnaanermik akuersissut taamaallaat inatsisitigut pisinnaatitaasumut pisussaataasumullu tulliuuttunik naammassinnittunut nalunaarutigineqarsinnaavoq:

- 1) suliffeqarfimmut piginnittut aningaasaliissutaannaanik akiliisussatut pisussaataasumut imaluunniit ingerlatseqatigiiffimmut ingerlatseqatigiiffimmi peqataasup minnerpaamik ataatsip ingerlatseqatigiiffiup akiligassanik akiliisussatut pisussaataasumut Kalaallit Nunaannilu angerlarsimaffeqartumut,
- 2) akiliisinnaajunnaarnermik-, akiliisinnaannginnermik- imaluunniit atorunnaarsitsinissaq pillugit suliaqarfigineqanngitsumut,
- 3) tassani suliffeqarfiup piginnittut aningaasaliissutaannaanik akiliisussatut pisussaataasup aningaasaataasa affai sinnerlugit inunnit pigineqarlutik, aamma taasisinnaatitaanermut piginnaatitaaffiit affai sinnerlugit toqqaannartumik toqqaannanngitsumilluunniit inunnit, § 12, nr. 1-miit 3 ilanngullugu piumasaqaatinik naammassinnittunit, pigineqarlutik,
- 4) tassani ingerlatseqatigiiffimmut ingerlatseqatigiiffimmi peqataasup minnerpaamik ataatsip ingerlatseqatigiiffiup akiligassanik akiliisussatut pisussaataasumi peqataasut affai sinnerlugit § 12, nr. 1-miit 4 ilanngullugu piumasaqaatinik naammassinnillutik, aamma
- 5) ingerlatseqatigiiffik pisortanut 100.000 kr.-it sinnerlugit akiligassanik akilerneqareertussaagaluani akiligassaqaassanngilaq.

Kapitali 5

Sillimaniarnermut pilersaarutit

§ 14. Takornarianik sullissisinnaanermik akuersissummik qinnuteqartup qinnuteqaammi nassiunnerata peqatigisaanik sillimaniarnermut pilersaarut allaganngorlugu ilanngutissavaa.

Imm. 2. Takornarianik sullissinissat suussusaat, akuersissutip malitsigisaanik neqeroorutigineqartussatut eqqarsaatigineqartut, tassani sullissinerit takornarianut sammitinneqarlutik, tamarmik sillimaniarnermut pilersaarummi imarineqassapput.

Imm. 3. Sillimaniarnermut pilersaarut kalaallisut tuluttullu qaqugukkulluunniit takornarianit tikinneqarsinnaassaaq.

Imm. 4. Sillimaniarnermut pilersaarut ajutoorutaasinnaasunik nalilersuineramik aamma upalungaarsimanissamut pilersaarummik katitigaassaaq aamma nutarterneqarsimassaaq.

Imm. 5. Pissutsit navianarsinnaasut pingaaruteqarnerpaat, suliniummut inatsisartut inatsisaanni matumani ilaatinneqartumut atassuteqartut pillugit, ajutooratarsinnaanermik nalilersuineq erseqqissumik annertuumillu paasissutissanik takornarianut ilisimasaqalersitsinissamut naleqquttuussaaq. Suliniutip piareersarneqarnerani ajutoorutaasinnaasunik nalilersuineq sulisut toqqarneqarneranni tungaviussaaq, matumani angalanermi siulersuisut, angalanermi piffissaliussaaq, pissutsit avataanersut nalilersorneqarneranni, atortussat toqqarneqarneranni il.il.

Imm. 6. Upalungaarsimanissamut pilersaarut ajutoorutaasinnaasunik nalilersuineramik tungaveqassaaq aamma tulliuttunik imaqqassalluni:

- 1) annakannajaartoqartillugu imaluunniit ajunaarnermik pisoqartillugu iliuusissat aalajangerneqartussat allaaserineqarnerat,
- 2) sulisuni suliniummi peqataasuni ilisimasassat, misilittagaqarnissaaq aamma pisinnaasaqarnerit pillugit paasissutissat, aamma
- 3) qinnuteqartup sulisuisa navianartumik pisoqartillugu qanoq qisuariaateqarnissaat pillugit, matumani attaveqaatigiinnerup eqqarsaatigineqarnera ilanngullugu, paasissutissat.

Imm. 7. Pisuni inatsisiliornerit allat imaluunniit aalajangersimasumik sulisaatsit, suliniutip pineqartup suliarineqarneranut atasumik isumannaallisaanermut piumasagaatinik malittarisassiussisut, aamma qinnuteqartup eqqortissallugit pisussaaffigisai, atuutsillugit, imm. 1-miit 6 ilanngullugu aalajangersakkaniittut atuutinngillat.

Kapitali 6

Sillimasiinermit matussusiineq aamma allatut qularnaveeqqusiineq

§ 15. Pisinnaatitaaffinnik piginnittoq inuussutissarsiornermi akisussaanermut sillimmasiisimanissaa imaluunniit allatut qularnaveeqquserneqarsimanissaa pillugit Naalakkersuisut piumasagaateqarsinnaapput.

Imm. 2. Pisuni, takornarianik sullissinernut pineqartunut matussusiisussamik inuussutissarsiornermi akisussaanermut sillimmasiisinnaaneq periarfissaatinnagu, aammattaaq qularnaveeqqusiinissaaq alla periarfissaatinnagu, imm. 1 atuutinngilaq.

Imm. 3. Imm. 1 malillugu sillimasiinermit matussuserneqarnissamut aamma qularnaveeqqusiinissamut piumasagaatit pillugit Naalakkersuisut malittarisassanik erseqqinnerusunik aalajangersaasinnaapput.

Kapitali 7

Najukkami sulisitat pisiortorfiillu

§ 16. Suliniutinut, takornarianik sullissisinnaanermut akuersissut malillugu suliarineqartunut, pisinnaatitaaffimmik piginnittup najukkami sulisitanik kiisalu najukkami nioqqutissanik kiffartuussinernillu pisiortorfinnik atuinissaa pillugit, Naalakkersuisut malittarisassanik aalajangersaasinnaapput.

Kapitali 8

Takornarianik sullissisinnaanermut akuersissummik tunineqarnerup kingorna pisinnaatitaaffimmik piginnittup pisussaaffii

§ 17. Pisinnaatitaaffimmik piginnittoq qinnuteqarsimatinnagu aamma taaneqartorpiaat pillugit suliniutit pillugit pilersaarummut akuersissummik Naalakkersuisunit pisimatinnagu, pisinnaatitaaffinnik piginnittup suliniutinik takornarianik sullissisinnaanermut akuersissummi ilaasunik aallartitsinissaa inerteqquataavoq.

Imm. 2. Suliniutinut pilersaarut naleqquttumik annertussusilimmik tulliuuttunik imaqassaaq:

- 1) Suliniutip ineriartortinneqarnissaannut kisitsisit anguniakkat pilersaarutigineqartut allaaserineqarnerat.
- 2) Illut, illuliat assigisaallu akuersissummut atatillugu qanoq pilersinneqarniarnersut aamma atorineqarniarnersut allaaserineqarnerat.
- 3) § 2, imm. 6 malillugu najukkami sulisitat, aamma § 2, imm. 7 malillugu takornarianik sullissininnaanermut akuersissut malillugu suliniutit suliarineqarnissaannut nioqqutissanik kiffartuussinernillu pisiortorfiit atorineqarnissaannut pilersaarutigineqartut allaaserineqarneri.
- 4) Isumannaallisaanermut tunngasunut pisussaaffiit qanoq ililluni naammassineqarnissaannik pisinnaatitaaffimmik piginnittup qulakkeerinninnissaata allaaserineqarnera.
- 5) Pisinnaatitaaffimmik piginnittup sulisui aamma isumaqatigiissusiorfigisai, takornariat aamma inuit allat, inuttut ajoqusernissamut navianartorsiortinneqanginnissaat qulakkeerniarlugu, pisinnaatitaaffimmik piginnittup suliniutai aamma aalajangersimasumik ingerlatseriaasia pillugit allaaserinninneq.
- 6) Pinngortitap illersorneqarnissaa, avatangiisit illersorneqarnissaat, aalisarnej piniarnerlu pillugit aamma sulineranut pissutsinut inatsisit aamma ataatsimoorussamik isumaqatigiissutit qanoq ililluni pisinnaatitaaffimmik piginnittup naammassinninnissaminik qulakkeerinninniarnernik allaaserinninneq.
- 7) Akuersissutip atorunnaarnerani, qanoq ililluni avatangiisit iluarseqqinneqarnissaannik pisinnaatitaaffimmik piginnittup qulakkeerinninnissaa pillugu allaaserinninneq.

Imm. 3. Pissutsit allanngornerisa tamanna piumasaqaatigippassuk, piaarnerpaamik aamma kingusinnerpaamik qaammatit 3 iluanni, pilersaarut allanngortitaq Naalakkersuisuni akueriteqqullugu pisinnaatitaaffimmik piginnittup nassiutissavaa.

§ 18. Suliniutit takornarianik sullissisinnaanermik akuersissummi ilaatinneqartut pillugit nalunaarusiaq, pisinnaatitaaffimmik piginnittup ukiumoortumik Naalakkersuisunut nassiutissavaa.

Imm. 2. Pisinnaatitaaffinnik piginnittup nalunaarusianik nassiussisarnissaa pillugu Naalakkersuisut malittarisassanik erseqqinnerusunik aalajangersaasinnaapput.

§ 19. Nalunaarusiaqarnermut atatillugu paasissutissat saqqummersimasut, pisortani oqartussanut suliffeqarfinnullu namminersorlutik oqartussanit pigineqartunut, Naalakkersuisut avitseqatigiissutigisinnaavaat.

Imm. 2. Inatsisartut inatsisaat malillugu takornarianik sullissisinnaanermik akuersissutit pillugit statistiskiusumik paasissutissat Naalakkersuisut tamanut saqqummiussinnaavaat.

Kapitali 9

Akitsuusiinikkut akileraarut aamma akiliutinik akiliineq

§ 20. §§ 21 aamma 22 malillugit, pisinnaatitaaffinnik piginnittoq takornarianik sullissisinnaanermut akuersissummut pisaminnut ukiumoortumik akitsuusiinikkut akileraarummik akiliisassapput. Akitsuusiinikkut akileraarut Naalakkersuisut pissavaat.

Imm. 2. Takornarianik sullissisinnaanermut akuersissummik piffissami tunineqarfiusumi. Akitsuusiinikkut akileraarummik akiliisussaataaneq aallartissaaq.

Imm. 3. Ukiumi, akitsuusiinikkut akileraarummut tunngasumi, decemberip naanerani akitsuusiinikkut akileraarut akilerneqassaaq.

§ 21. Akiliuteqarluni aalisarnermut akuersissutitut akitsuusiilluni akileraarut tassaavoq tunngaviusumik akigititaq tapilu.

Imm. 2. Tunngaviusumik akigititaq ukiumut 2.500 koruuniuvoq.

Imm. 3. Tapi tikeraartumut ataatsimut ullormut ataatsimut 130 koruunitut naatsorsorneqassaaq.

Imm. 4. Imm. 2-imi aamma imm. 3-mi aningaasat amerlassusaat procenti aaqqiissutissaaq atorlugu naleqqussarneqassapput.

§ 22. Akuersissutitut § 21-imi ilaatinneqanngitsunut, akitsuusiinikkut akileraarut ukiumut 7.500 kr.-iusoq akilerneqassaaq.

Imm. 2. Imm. 1-imi aningaasat amerlassusaat procenti aaqqiissutissaaq atorlugu naleqqussarneqassapput.

§ 23. Inatsisartut inatsisaat malillugu suliamik suliarinninnermut aamma oqartussaasut oqartussaasutut suliaqarnerannut atatumik aningaasartuutit, pisinnaatitaaffimmik piginnittumit akilerneqarnissaat pillugit Naalakkersuisut malittarisassanik aalajangersaasinnaapput.

Imm. 2. Imm. 1 malillugu akiliineq akiliutitut akileqquneqassaaq.

Kapitali 10

Nakkutilliineq, naalakkiuteqarneq aamma takornarianik sullissisinnaanermut akuersissutit atorunnaarsinneqarnerat

§ 24. Takornarianik sullissisinnaanermut akuersissutinut, pisinnaatitaaffinnik piginnittunut, suliniutinut aamma pissutsinut inatsisartut inatsisaanni ilaatinneqartunut, Naalakkersuisut nakkutilliissapput.

Imm. 2. Nakkutilliinerup suliarineqarnissaa pillugu Naalakkersuisut malittarisassanik aalajangersaasinnaapput, matumani Kalaallit Nunaanni Namminersorlutik Oqartussat ataanni oqartussaasoq imaluunniit sullissivik sorleq nakkutilliinermik suliaqassanersoq ilanngullugit, imaluunniit nakkutilliinermik piginnaasaqarneq kommunalbestyrelsinut suliaassiissutigineqarnissaa pillugu.

§ 25. Pissutsit inatsisinik unioqqutitsisut iluarsineqarnissaat imaluunniit atorunnaarsinneqarnissaat pillugit pisinnaatitaaffimmik piginnittumut aamma allanut inatsisartut inatsisaanni matumani ilaatinneqartunut, Naalakkersuisut naalakkiummik nalunaaruteqarsinnaapput.

Imm. 2. Pisinnaatitaaffimmik piginnittoq inatsisartut inatsisaat malillugu naalakkiummik malinnikkumanngippat, akuersissut inatsisartut inatsisaat manna malillugu atulersinneqartoq Naalakkersuisut utertissinnaavaat.

Imm. 3. Takornarianik sullissisinnaanermut akuersissutit utertinneqarnissaat pillugit Naalakkersuisut malittarisassanik aalajangersaasinnaapput.

§ 26. Pisinnaatitaaffimmik piginnittup pisussaaffii qanoq annertutigissanersut imaluunniit pisinnaatitaaffinnik piginnittoq akuersissutip naanerata kingorna allakkut pisussaaffeqarnerasoq pillugu, matumani pisinnaatitaaffimmik piginnittoq akuersissut malillugu suliniutit naammassineranni illunik, illuutinik il.il., pisinnaatitaaffimmik piginnittumit pilersinneqartunik, paaassasoq, kiisalu iluarsaassissasoq, tamatumalu kingorna nakkutilliinermik assigisaanillu suliaqarnissaa ilanngullugit, Naalakkersuisut malittarisassanik akuersissummilu piumasaqaatinik aalajangersaasinnaapput.

Imm. 2. § 17 malillugu suliniutit pillugit pilersaarutip akuersissutigineqarnerani, imm. 1 malillugu pisinnaatitaaffinnik piginnittup pisussaaffiisa naammassineqarnissaannut qulakkeerinninniarluni piumasaqaatinik Naalakkersuisut aalajangersaasinnaapput, matumani qularnaveeqqusiinissaq pillugu. Pissutsit allangornerisa tamanna pisariaqartilerpasuk, piumasaqaatit allangortitat Naalakkersuisut aalajangersarsinnaavaat, matumani qularnaveeqqusiinerup allangortinneqarnissaa pillugu.

Imm. 3. § 25, imm. 1 malillugu torersaanissamik naalakkiut pisinnaatitaaffimmik piginnittup naammassinngippagu, pisinnaatitaaffimmik piginnittup akiligassanik akisussaaffianillu Naalakkersuisut suliniutit aallartissinnaavaat.

Kapitali 11

Pineqaatissiinerit

§ 27. Inuk piaaraluni imaluunniit mianersuaalliorujussuarluni tulliuqartuq akiliisitsissummik akiliisitaasussanngortitsisoqarsinnaavoq:

1) § 14, imm. 3-mik, § 17, imm. 1-mik, aamma § 15, imm. 1-imi aalajangersarneqartunik piumasagaatinik unioqutitsisoq,

2) Paasissutissanik oqartussaasup il.il. piumasagaataanik eqqunngitsunik imaluunniit salloqittaataasunik tunisinermigut § 6, imm. 1-imi unioqutitsisoq, imaluunniit

3) suliniutit takornarianik sullissisinnanermut akuersissummi ilaatinneqartut pillugu nalunaarusiamik Naalakkersuisunut nassiussinnginnermigut § 18, imm. 1-imi unioqutitsisoq.

Imm. 2. § 3, § 4, imm. 5, § 6, imm. 2, § 15, imm. 3, § 16 aamma § 18, imm. 2 malillugit malitassani atulersinneqartuni, Kalaallit Nunaanni pinerluttulerinermi inatsimmi malittarisassat malillugit pineqaatissiinerit akiliisitsissutitut ilusillit aalajangersarneqarsinnaapput.

Imm. 3. Inatsisartut inatsisaat imaluunniit inatsisartut inatsisaat malillugu malitassat atulersinneqartut akiliisitsissutit aalajangerneqarnissaa periarfissaliissutigippagu, akiliisitsissut Kalaallit Nunaanni pinerluttulerinermi inatsimmi malittarisassat malillugit inatsisitigut pisinnaatitaasumut pisussaataasumullu akileqquneqarsinnaapput.

Imm. 4. Akiliisitsissutit, imm. 1-imiit 3 ilanngullugu malillugit aalajangersarneqartut, nunatta karsiata pissavai.

Imm. 5. § 6, imm. 1-ip, § 18, imm. 1-ip, imaluunniit § 3, § 4, imm. 5, § 6, imm. 2, § 15, imm. 3, § 16 aamma § 18, imm. 2 malillugit aalajangersakkat aalajangersarneqartut unioqutinneqarneranni, Kalaallit Nunaanni pinerluttulerinermi inatsimmi malittarisassat malillugit arsaarinninneq pisinnaavoq. Arsaarinninneq nunatta karsianut iluanaarutitut pissaaq.

Kapitali 12

Atuutilersitsinermut- ikaarsaariartitsinermullu aalajangersakkat

§ 28. Inatsisartut inatsisaat ulloq 1. januar 2025 atuutilissaaq.

Imm. 2. Sumiiffinni nunami aalajangersimasuni takornariartitsinermut akuersissuteqartarnissaq pillugu Inatsisartut inatsisaat nr. 19, 3. december 2012-imeersoq atorunnaarsinneqassaaq.

Imm. 3. Takornariartitsinermik suliaqarnermut akuersissutit, Inatsisartut inatsisaata atuutilernerani nalunaarutigineqartut, atuuttuusertik attatiinnassavaat. Akuersissutinut taamaattunut Sumiiffinni nunami aalajangersimasuni takornariartitsinermut akuersissuteqartarnissaq pillugu Inatsisartut inatsisaat nr. 19, 3. december 2012-imeersumi maannamut malittarisassat atuuttut atuutissapput.

Imm. 4. Inatsisartut inatsisaanni § 21, imm. 4, aamma § 22, imm. 2 malillugit procenti aaqqiissutissaaq atorlugu naleqqussaaneq, siullerpaamik 1. januar 2026 pissaaq.”

Siunnersuummut oqaaseqaatit

Oqaaseqaatit nalinginnaasut

Inatsisartut inatsisaata kalaallisoortaata qallunaatoortaatalu akornanni oqaatsitigut naapertuuttoqarnissaata qulakkeerneqarnissaa allannguutissatut siunnersuutip qulakkiissallugu siunertaraa.

Inatsisissatut siunnersuummi aalajangersakkanut ataasiakkaanut oqaaseqaatit

Nr. 1-imut

Allannguutissatut siunnersuummi oqaaseqaatit nalinginnaasut innersuussutigineqarput.

Nr. 2-imut

Allannguutissatut siunnersuummi oqaaseqaatit nalinginnaasut innersuussutigineqarput.